

小倉山房文集

袁枚著  
王英志校點

小倉山房外集

袁枚著  
王英志校點

# 袁枚全集

貳



**(蘇)新登字006號**

**袁枚全集**

王英志 主編

---

江蘇古籍出版社出版

江蘇省新華書店發行

江蘇省如東印刷廠印刷

開本850×1168毫米 1/32 印張203 插頁64 字數4,136,000

1993年9月第1版 1993年9月第1次印刷

印數：1—2,500冊

---

ISBN7—80519—496—3/1·148 定價：200.00元(全八冊)

責任編輯：徐文博 朱野坪

## 序

李英

隨園先生古文三十卷，以駢體六卷爲《外集》，命英序之。英按：散行文尚矣，然體裁必相題而作。嘗讀韓昌黎《黃陵廟碑》、柳子厚《湘源二妃碑》、索索無味，令人不得不思王、楊、盧、駱。蓋題本俶詭，難以質言；故表啓賀謝之類，無甚意義，非徵典不文，非偶語不莊。先生于此體不多作，亦不輕作。存者若干，古藻繽紛，大氣旋轉，足冠一朝。英擬學李善注《文選》，以公之于天下，苦讀書不多，未敢貧相妄測。乃先爲之揭其立言之旨，而箋釋之功，姑俟諸異日。

常州受業門人翰林檢討李英拜撰。

## 題隨園駢體文

蔣士銓

飛書用枚臯，典冊用相如。子雲實有言，兼者其誰與？文章有儷體，「六經」開權輿。凡物比奇偶，整散爲密疏。取材各有宜，載道無差殊。揚、馬盛西京，班、張冠東都。《典論》推七子，繼美稱庚、徐。皆伸七襄手，共握璇璣樞。袁公秀江東，珥筆游蓬壺。是古制誥才，學士同中書。顧以沈、宋身，出曳囊、黃裾。仕宦忽不樂，買山賦《閑居》。栽花作友朋，列屋成畫圖。發揮巧匠心，結構隱蘆。萬卷圍一身，才氣橫太虛。位卑乃著作，李翱言有諸。詩文積三篋，億萬光明珠。談笑出五能，霑灑卿大夫。戶牖筆研陳，瓶甕楷墨儲。皇皇四六文，雲霞相卷舒。百家入針縷，群史供庖厨。一索貫萬錢，任、沈、顏、謝俱。文律一動搖，官商即奔趨。詞源一沃蕩，河海咸灌輸。趣昭事益博，慮周藻相敷。手持注水箭，放溜決川渠。思風鼓言泉，造化不得拘。武夫與悍卒，願爲老鐵奴。序傳祖十翼，表啓根三謨。銘志列俎豆，廟碑肅瓊琚。以意立真宰，以氣爲匡扶。彩綉赴纂組，英華恣含咀。花骨屬天稟，綺靡亦其餘。翡翠戲蘭苕，鴛鴦立芙蓉。纏綿風月懷，曲曲相縈紆。此體有正宗，不收歐陽、蘇。何況陳迦陵，碌碌章與吳？我胸無書籟，我腹非冷爐。曾職應付文，同官笑其粗。自慚張伯松，不識揚雄徒。公文我獨嗜，負弩充前驅。敢學皇甫謐，佛頂強加污？

乾隆己丑落燈夕，館後學蔣士銓題。

# 外集目錄

## 卷一 表、序

擬乞假歸娶表	一
爲尹太保賀伊里蕩平表	二
爲莊撫軍賀平伊里表	四
爲黃太保賀平大金川表	五
代江南紳士謝萬壽恩科表	六
《鶯脰湖莊詩集》序	七
萬柘坡《樂于集》序	九
送姚次公刺史之景州序	一〇
許南臺《悼亡詩》序	一一
送尹官保熱河陪宴西戎序	一二

小倉山房外集 目錄

## 卷二 序

贈樊生序	一四
尤貢甫《出塞詩》序	一六
《紅豆村人詩》序	一七
周石帆《西使集》序	一九
《綉餘吟》序	二〇
送梅循齋總憲歸宛陵序	二二
李紅亭詩序	二三
岳水軒詩序	二四
陳古漁《詩概》序	二六
王郎曲序爲溫皆山吏部作	二八

一

卷三 序、祭文

尹公七旬生辰授文華殿大學士序……………三  
 孫小玫《簪花圖》序……………三  
 尹似村公子詩集序……………三  
 竹軒小集詩序……………三  
 送尹太保從兩江入閣序……………三  
 瞻園小集詩序……………三  
 俞楚江詩序……………三  
 瞻園兩公子《送行詩》序……………三  
 尹文端公詩集序……………四  
 熊蔗泉觀察詩集序……………四  
 代渤海相公祭尹太保文……………四  
 祭吳桓王廟文……………四  
 公祭襄勤伯鄂公文……………四  
 檄吳縣城隍神文……………四  
 祭盧恭人文……………四

卷四 書

上尹制府書……………五  
 答王厚齋書……………五  
 與蔣苕生書……………五  
 與延綏將軍書……………五  
 與雨林、似村兩公子書……………五  
 上台觀察書……………五  
 慰蔣用庵侍御失火書……………五  
 與楊蓉裳兄弟書……………五

卷五 啓、疏

代許方伯為高太恭人徵詩啓……………五  
 謝金撫軍薦舉博學鴻詞啓……………五  
 擅責旗廝謝岱將軍啓……………六  
 謝薦擢高郵刺史啓……………六  
 上尹制府乞病啓……………六

爲黃太保賀經略傅公平大金川啓	七〇
謝蘇州趙太守啓	七二
賀尹太保側室張氏封一品夫人啓	七三
謝瞻園托大中丞賜牡丹啓	七四
爲雲華君 <sub>△</sub> 翠袖圖 <sub>△</sub> 徵詩啓	七五
謝尹太保和詩啓	七六
謝慶侍郎贈灰鼠裘啓	七七
代請熊滌齋先生重赴鹿鳴啓	七八
募修成仁庵疏	七九

## 卷六

碑、墓志

贈提督任勇烈公神道碑	八一
御祭下忠貞公墓紀恩碑記	八四
重修于忠肅廟碑	八五
兵部左侍郎凌公神道碑	八八
東閣大學士蔣文恪公神道碑	九〇
六營公立兩江總督尹公去思碑	九四

餘杭諸葛武侯廟碑	九五
莊西麓先生墓表	九七
誥封奉政大夫江南左營游擊署城守副將加 三級孫公墓志銘	九九
常德府知府張古香墓志銘	一〇一
誥封奉政大夫丹陽縣知縣魏公墓志銘	一〇四
汪君楷亭墓志銘	一〇六
客吟先生墓志銘	一〇八
聰娘墓志	一〇九

## 卷七

補遺

代祝兩江節相渤海公七十壽序	一一三
陳涇南 <sub>△</sub> 修禊詩 <sub>△</sub> 序	一一四
金賢村太守詩序	一一五
梅軒先生六十壽序	一二七
謝渤海相公元旦賜鹿、豕、鵝、鴨等物及「福」 字啓	一二九

爲章太宜人七秩徵詩啓	二〇
郡文學呂君墓志銘	二一
孫淵如亡妻王孺人墓志銘	二二
徐君禮珍墓志銘	二三
陳淑蘭女子詩序	二四
劉霞裳詩序	二五
贈儒林郎翰林院待詔厚齋項君暨姚安人合葬墓志銘	二六
贈中議大夫孝廉隱谷孫君暨范太淑人合葬墓表	二七
禮親王世子詩序	二八

卷八 補遺

思元主人詩序	一三三
陳檢討《填詞圖》序	一三四
《宮闈雜咏》序	一三五
《清娛閣合刻詩》序	一三七
公祝奇麗川中丞五十壽序代	一三八
恩賜世襲雲騎尉羅漢門縣丞陳君墓志銘	一四〇
重修錢武肅王廟記代杭州李太守作	一四二
銅鼓賦	一四五
《紅豆村人詩稿》後序	(存目)



# 小倉山房外集卷一

## 擬乞假歸娶表

臣聞：五算徵民，嘉禮首隆，辟合；三清論職，詞臣本屬閑曹。故知納幣親迎，卿士可以入告；越境反馬，《春秋》不譏曠官。况乃宦在婚先，妻因夫貴。釋褐與結褵并賦，花釵與爵弁齊明。長源成婚，北軍供帳；敏中來婦，金紫迎風。凡文人未有之榮，皆聖代遭逢之盛。

欽惟皇帝陛下，兩儀合撰，三皇如春。乘龍德而山澤通，吹鳳管而雌雄應。雖上林鳴鳥，無不帶露雙飛；即太液游魚，亦各銜恩逐隊。固已民無怨曠，草盡繁蕪。臣西浙童牙，寒門白望。十二歲舉茂才，二十歲舉鴻博。樂昏未擾，即來觀國之光；《皇雅》未歌，無暇《房中》之奏。是以十年不字，三族無虞。藉瑟琴平學道之心，懼兒女累風雲之氣。《雉朝飛》而有曲，雁宵莫以無聲。

茲蒙皇上聖恩，選臣爲翰林，授臣爲吉士。才非李白，登七寶華床；學愧康成，注三商昏義。采蘋采藻，方陳太史之詩；一陰一陽，未卜《家人》之卦。因五夜之待漏，驚三星之在天；愧六禮之行遲，感九重之恩早。賜面藥口脂于漢臘，男子受之而不芳；考褒衣綸翟于《周官》，鰥生讀之而有羨。蓬山風冷，東觀宵長。管筆則金粉飄零，早朝而衣裳顛倒。偶然割肉，無可相遺；即賜沐湯，不願居外。青綾被好，孤熏郎署之香；黃紙緘封，虛貯孺人之號。仙侶疑其命隻，中涓笑作童真。如臣者，

想亦媒氏所平章，相公所調燮者歟？

今乃故鄉冰泮，下達書來。或盼游子以倚閭，或布几筵而筮日。鄉誇衣錦，畫可還鄉；兒贖君羹，歸當貽母。承筐無實，已《歸妹》之愆期；有女懷春，非吉士其誰誘！而況單鳧寡鵠，豈宜濫列鶼行？介特孤丁，未敢纂修吉禮。伏求皇上賜臣歸田之假，成臣合巹之榮。雙鳳闕前，許借飛龍之厩；三神山下，輕回弱水之船。取清俸以陪門，五兩不過；率陰臣而拜闕，九十其儀。將見燭撤金蓮，光來天上；袍披蜀縠，香到人間。史筆催妝，銀管耀青廬之色；天錢撒帳，女床聽鸞鳥之鳴。當天下有道之時，我黻子佩；趁父母俱存之日，男唯女俞。明年春水生時，屈指微臣來日。步八磚而即至，不敢迷花；歌味旦以趨朝，同聽警枕。

### 爲尹太保賀伊里蕩平表

臣聞：王者大一統之義，《春秋》復九世之仇。古之聖人，握金鏡，秉神機，固將亭毒八荒，盧牟六合也。然神禹導河，不過積石；秦皇立界，止于臨洮。軒轅轡野之師，高辛觸山之務，成湯三股之伐，周王縮水之誓，雖智竭囊底，而功止寰中。未有我武惟揚，窮天之界如今日者。

欽惟皇帝陛下，一人有慶，五岳無塵。海水不波，問摩訶無使者；青雲干呂，知中國有聖人。固已絕地通天，瞻雲奉律矣。惟準噶爾夷部，僻處西陲，跳梁沙漠。稽兩朝之文化，煩列聖之天心。楛矢來庭，則許甘松之互市；赤囊報警，則鳴琅鐸以專征。張弛異宜，德刑兼用。亦以事機有待，夷性難馴故也。今天誘其衷，神厭其德。達爾札與達瓦齊等，篡弒相仍，風災迭起。撐犁不識，敢倚天

驕；朝定無人，自然鳥散。車楞吳巴什等率衆投誠，阿木爾撒納等領軍踵至。或吹蠶享使，或虜面請兵；或失鉢請除一官，或燒當願當一隊。國中牛馬，盡向南眠；天上旄頭，早看星落。五單于爭立，是匈奴降漢之年；九節度出師，正回紇尊唐之日。我皇上擴覆載之仁，不置遠方于度外；運照臨之智，早悉此虜于目中。于是牙璋先頒，金珙獨斷，贊蔡州之伐，惟裴度一人；計烏桓之兵，屈陳湯五指。從竈上騷除瀚海，取灰盤指畫天山。歸漢封君，叩關者即加顯擢；祛衣作衛，鳴鑼者俾作先驅。西北分兩道之兵，聲勢動九天之上。如太陽之沃霜雪，所過皆消；譬久旱之得雲霓，歸來恐後。蛇矛未拔，銀鶴先奔。逐窮寇而狐尾頭低，草降書而羊皮紙盡。但整六師而返，不見一虜而還。萬馬禁聲，盡解鞍而蹴鞠；諸夷無事，將買犢以耕耘。開壅門招壞莫之臣，取流沙爲附庸之國。惟聖人之德大，斯不怒而威；亦王者之功高，故有征無戰。踐龍庭之草，露偃春風；出玉門之關，花開內地。

伏念我聖祖遠滅延佗，河西遺種；我世宗窮搜靺鞨，黑水留州。凡祖宗累年未竟之貽謀，皆皇上一旦纂成之鴻業。金山擒車鼻，本文皇漏網之魚；渭水謁單于，慰高祖平城之憾。被我純績，戴我金犀。飲朱提者，三千人而未乾；置驛遞者，六百所而更遠。從此受降城下，新來冠帶之民；都護府中，不用防秋之策。禽黎、呼毒，望氣來庭；煎鞏、黃牝，聞風請吏。拔銅柱以歸地，取金人而祭天。化此輩爲孝子順孫，何嫌荒服；呼中國爲仙宸帝所，都恨來遲。

臣職任兩江，神馳九陸。想北闕凱旋之日，正南風解愠之時。愧臧旻之才，遍數三十六國；譯朱普之句，敢增千百萬言。一曲《鏡歌》，聽策助于太史；兩階干羽，願增喜於龍顏。

### 爲莊撫軍賀平伊犁表

臣聞：時不可失，而知幾惟聖人；功有非常，而止戈惟王者。歸邪星出，國有降君；騶虞獸來，邊無烽警。是以漢臣中西域而立幕府，唐皇取松外而置縣官；猶欲刻玉燕然，鑄金青海。況單極以外，淳維之苗，率土來歸，無思不服！求之邃古，實所希聞。

欽惟皇帝陛下，八紘靜塵，十洲澄鏡。久已填廬山于赤縣，擁狼望于黃圖。惟準噶爾部落，遠恃流沙，荒驕大漠；屢稽質子，不供包茅。我聖祖萬乘親征，掃蠲蟪之絕塞；我世宗五兵暫戢，貸烏鼠之餘魂。如後漢之與南夷，七擒七縱；比延光之于西域，三絕三通。未嘗不以丹水之師，遠期伯禹；崇墉之伐，深望姬昌也。今達爾扎自嚙焦梨，達瓦齊形同戶逐。牛羊不壯，知突厥之將亡；魚鼈無橋，識東明之不渡。坐金床以望太歲，星拱中華；祝獬狔而問大神，巫誇漢盛。

是以車楞烏巴什與阿睦爾撒納等，或舞天先至，或嗅地旋來。當是時也，五幡遺孽，只用箠笞；九塞旋風，但需鞭打。倘杜崇拒單于之上表，則安國必捲帳而自驚；班超還疏勒而先歸，則黎弇以遠漢而自剄。懷皇仁者，雖歌《槃木》；議國事者，爭棄珠厓。聖上以爲非常之原，黎民所懼；先幾之務，惟斷乃成。在貞觀之拒康居，雖云量力；而建武之辭西域，終少雄圖。乃射苑竹以卜西羌，推棋枰而決大策。鞞盾一戟，龍麗十重。網設周防，軍歌鐵拔。以党項爲前導，故知吐谷之風沙；假北韃爲疑兵，遂抵焉耆之巢穴。周道如砥，漢將皆飛。反首芟舍而奔者，虜行如風；繩行沙度而來者，視道若咫。收黑山四百三之部落，耀朔方十八萬之旌旗。雪嶺橫天，上下搜而全無虜迹；賢王伏地，左右視

而都是陪臣。築三受降城，置五屬國府。使漢家長無北念，信中國果有聖人。數武庫之兵，未遺一矢；計鬼方之克，何有三年？檄傳古莽而猶驚，碑借昆侖而尚小。凡魚支之鞞，《婆駝》之樂，隨封三日，權扶兩頭。朱蒙爲河伯外孫，老胡號大荒樸父。靡不分頒將士，布列郊圻。圖《王會》于明堂，坐舌人于門外。陳牲告廟，慰列祖在天之靈；晉冊承歡，加聖母深宮之膳。捷書夜至，群臣悟怯戰之非；恩旨朝頒，天下以從軍爲樂。

臣伐吳定策，既有愧于張華；平蔡刊碑，又有慚於韓愈。願譯《歸義》之章，提官隗構；更歌《奉聖》之樂，《獨鶴》、《琴驪》、《庶申雀躍》之忱，聊補《鏡歌》之闕。

### 爲黃太保賀平大金川表

臣聞：天地生成，溫肅并行之謂道；皇王敷化，神武不殺之謂功。德至聖，則股肱之效力也神；化極隆，則宇宙之包容者大。

欽惟皇帝陛下，秉神機而理百度，握金鏡以御四方。震旦國中，金輪光涌；指南車上，鐵轡痕消。久已四海鶉居，八荒蛾伏。乃逆苗莎羅奔、良爾吉等，夜郎自大，邛竹未供。懷駒支漏泄之謀，走覺翫、蠶叢之路。以爲湯升陟野，巢伯可以不朝；禹會塗山，防風且將後至。皇赫斯怒，我武惟揚。街亭撤馬謖之軍，巴蜀用崇文之將。設金方一道，從枕席行師。聚米殿前，早見丸泥之狀；借籌闔內，預知沃雪之功。蓋王者之兵，原不得已而後用；非常之將，亦秉成訓而始行。則有經略臣博恒，穆行忠衿，義心清尚。雷符星斗，光顏自有旌旗；干櫓戈矛，賀齊別爲文畫。磨劍則崆峒飛雪，彎弓而太白

揚眉。金累爲之開山，黔羸爲之領路。斬皇甫文之頭，先除謀主；超張須陁之柵，多用奇兵。百尺井欄，射公孫樓上；千群火雉，投姚襄陣中。周訪之兩甄忽鳴，光弼之三麾至地。山形拔而不假五丁之力，天網密而但求一面之開。正月初六日，逆苗面縛詣大軍乞降。

當是時也，雲捲天衡，日生倍瑤。砂能表赤，大書北向之旗；水尚知歸，敢射南飛之雁。在諸將以爲獸將入檻，雖搖尾而法無可寬；在聖人以爲鳥已含環，既投懷而情難盡殺。蓋當日之興師也，原非貪其土地人民，而必置之于死；故此日之受降也，實不忍其悔過服罪，而姑宥之以生。于是廷光城下，馬燧披襟；回紇帳中，子儀免胄。狹徒麕至，捧牢賞以趨蹌；穢人兒啼，擊蒙排而泣下。俟錢寶布，爭貢包茅；渝舞巴歌，長廣《繁木》。赤眉得不死之詔，南人無復反之心。火鼠窮郊，留將軍畫像；玄蹄外境，傳露布風聲。群瑤聽飲至之文，吹蘆相告；野老讀班師之詔，鼓缶而歌。大凱來旋，策勛告廟。此皆我祖宗在天靈爽，暗靖妖氛；我聖母覆物仁慈，挽回和氣。故能有征無戰，惟斷乃成。念切顯揚，式崇徽號。宣仁家法，安邊塞于宋朝；太姒徽音，贊尚征於周伯。輝生寶冊，喜溢彤庭。

臣未列銀刀，空名節度；願供金版，上佐秋官。羌女呵陵，曾隸韋皋之籍；夷男始艾，愧無仲郢之功。遠百辟之班聯，心知舞蹈；獻九天之春酒，花滿江南。

### 代江南紳士謝萬壽恩科表

蓋聞聖人御世，八荒在壽域之中；王者掄才，三物重寶與之禮。是以姬王受命，蒸髦士于岐陽；漢帝祈年，辟孝廉于郡國。莫不丹魚在藻，翠鳳含綬。然而成周僻在方隅，空閭宴鎬；《泰玄》增受神

冊，但說呼嵩。未有際兩聖之昌期，靈晟并耀；展九乾之文運，汨作重書；以八千歲爲春秋，將五百年得名世；如今日者也。

欽惟皇帝陛下，如日之升，慶六旬於今歲；皇太后陛下，如天之福，開九秩于明年。凡橫目冒彰者，靡不群歌佛誕；即岩居穴處者，久已如登春臺矣。乃皇上聖德謙冲，孝思維則。一切有司，奏行恩賚；爲而不有，統于所尊，禮也。詔庚寅之年，開甲乙之榜。黃封頒下，白首歡呼。惟大孝以天下養親，故慶典悉遵懿旨；惟聖人以人才治國，故賢書首列恩綸。潤采菁莪，不羨蟠桃之色；廷收杞梓，益增壽木之華。以多士之弦歌，代《雲仙》之羽奏；以文昌之奎壁，當貢物之承筐。玉載萬隻以非奢，珠探九淵而愈耀。枝枝丹桂，飄香于王母筵前；戢戢龍魚，跋浪于老人星下。于是黃髮耆文之士，莫不乘景運以同升；方聞綴學之儒，亦各有喜色而相告。

臣等生隸江東，忝居文苑。或影纓擔爵，世受國恩；或解綬懸車，引恬鄉里。捧璽書以感泣，率門子以觀光。祝軒鼎之長生，齊呼萬歲；喜周官之大比，不待三年。所有感忭之忱，謹以表謝。

### 《鶯脰湖莊詩集》序

夫金石之載不殊，而諷咏之情匪一。故思綺者春榮，響哀者秋厲；音和者鳳唳，絲寡者鷓悲。引氣不齊，意製相詭，各家之旨，斷可識矣。若夫游雲無質，五色兼麗；昆竹久淹，八風齊協。徹徧群雅，喉衿「六藝」，搜仇索糶，能者誰歟？

丙辰歲，天子張天網以羅八紘，握金鏡而闢四門。予正廩係履而來都下，遇王梅泚，讀其詩，偶

然亂費乎錦纈，影影然履綦于機槍；研閱以窮照，含章而司契。楚艷漢侈，殆具體焉。爾乃解巾吳會，弭筆燕臺。仲宣履至，公卿爲之擁簪；平子歌成，洛下于焉卷舌。且復負《雞次》以西嬉，歌《蘭蛙》而晉適。澄神道岸，回志元祺。生死多羊舌之仁，慷慨重侯嬴之義。其所述也如彼，其所蘊也若此。使之吟鶯陪軒，鳴蟬映鬢；隨鼉，買入室，共應，劉待詔。張皇發揮，元元本本。胡寧惡焉？

乃昔者同登明光之殿，對食大官之餐。蒙以弱冠之間，物色賈生；遂因連牆之謁，通好列子。亡何，黍谷方吹，豐城氣掩；東陽未晞，北溟翼戢。卧龍具以忍寒，握蛇珠而匿耀。感奇律之不采，抱梯黃而莫卜。與鄧康辟者，比牒皆爲宰相；同高允徵者，連名半屬公侯。其能無撫髀而嘆八騶，呪柱而看三匝乎？

雖然，珠之藏也不久，不能矚重淵之深；劍之割也易用，不能致蛟龍之惜。故白露之思，蒹葭之隱也；俎豆之馨，叢蘭之敗也。今梅泝內學七緯，外過八流。其藏身也，鮒人而鯢居；其治行也，春規而夏矩。入則流黃體素陳焉，出則烟皋雲隔覽焉。宜其因情生文，上符《三百》之旨；緣隙奮筆，流爲千載之觀。彼夫車赫馬耀，傳呼甚寵，而寸枝不入鄧林，尺渠不登《山經》者，何哉？豐富之遇殊，而大小之報異爾。

或者傷國朝諸老，燿忽代謝。竹垞南淹，阮亭北逝；不知璧不并耀，駿不雙馳。根斷靈苑，秀擢江波。所謂長麗去而宛虹來，耀靈淪而望舒睇。夫固有繼之者也。而况夫大雅之運，豈偶然哉？



## 萬柘坡《樂于集》序

夫神之所至，百骸聽焉；志之所壹，萬物避焉。故鯁俞審音，不聞暴雷之駭；獲人運斫，不見疾駒之馳。士有握瑾瑜，懷芬芷，絕地理，挾天庭；抗才金碧之上，弭節江湖之下；恢恢元音，務諧雅奏之。落落凌颺，詎假繁音之會；則吾友萬柘坡其人也。

生而醴粹，第作其冠；長多咫聞，溺苦于學。參六家之要旨，窮五際之絕業。游目竹素，殫心忽微。故能含孕嚴、徐、凌、鑠、崔、蔡。懸黎不見，池隍耀繼起之寶；皇娥歲淹，夷光矜代出之色。惟古于茲，竄其然矣！然而憶日月之燦忽，追編紵之伊始。時則迅秋標爽，嚴鼓應節。石渠廣鴻生之召，郡國有文學之徵。僕與柘坡，解巾之郡，削牘受辭。魚集龍門，摩游鱗而認隊；馬來西極，銜長鬣以得朋。所爲傾蓋于程生，締蘭于謝覽也。

已而扶搖同志，修翮互殊。或霞舉于嘉禾，或翰飛于粵嶺。赤堇未錮，齊踊躍于洪爐；白鹿可尋，仍渺迷于蕉葉。東隅已失，南金不雙。宜乎鮑申跪石而吟，伍員兩袂而走矣。而柘坡方且得不挺心，失不表色。結情禹井，延首舜梧。考元唐、隆谷之瑰奇，辨封鉅、大填之原委。忘陽數之標季，扶元音于正宗。空谷霜零，蘭性寧其隕貴；崇丘風靜，椒林于焉露芳。抒懷而貊其音，說學而振其采。詩若干卷，幾幾乎革孫、許之風，變《太玄》之氣焉。

且夫瓠梁托弦以流韻，痛知音之難也；師曠審鐘爲不調，嘆逃聲之易也。柘坡鄙硯散之五降，美棣通于八風。既煉淬以澄音，亦鶴金而飭貌。考之臯氏，槩曰《樂于》。震蒲牢之砰礚，招銅山之遠